

獨
漉
堂
詩
集



序

南昌友兄彭士望躬菴撰

詩者性情之物世徒以色澤聲調爲之此僞體日侵淫乎天下而其真者累千百人不一遇也能真矣才不足以達之編澀離鑄時復側出罕寬裕自得之意其光不能四應才矣不有法以御之其于衝突排募刺取闖關變化無古人貫穿出沒其中師心之智用之有涯李將軍野戰遇匈奴未免敗北騰兒馬始得歸蓋嚴則有暇暇則不窮其法勝也吾易堂魏和公從南海歸亟稱陳元孝之人與其友推重其詩予同堂咸信之雖未一識

元孝間寓書輒齒兄弟乙卯扶衰旨艱險數千里入粵
始得見元孝與之語落落穆穆不能口給久而意味出
焉心知元孝沉痛患難學與年深馴猛鷲之氣漸就和
易如張孺子旣見石公讀其書精悍之色不復見于顏
面是其杜德機也又久始出尊公巖野先生集暨其獨
漉堂詩藁示予予莊誦先生諸書使見用于南渡尙可
支半壁執政聽之不失爲南越大長老臣有言不信卒
以劔許邵子曰百姓無福百淳亦無福先生之謂矣隨
繙獨漉堂詩諸體兼擅手觸肩倚莫不中音意格渾成
發人神悟今之人作忠孝節烈詩用長句定從焦仲卿

妻摹出元孝作王將軍輓歌氣體逼真漢人求之字句
間絕無一肖其託旨之遙紀事之細千載之下猶見其
人卽令司馬子長傳之殆不能過嘗誦李白古詩五十
九首陳子昂感遇詩吾特少陳之奧琢而太白動輒言
仙誕而無味元孝感懷十六首卽性情爲風雅典則平
淡中出之悱惻哀傷沉而不肆高世用世兼有之何論
陳李己不知漢人十九首是何章句自勵詩脫屣詰辭
痛定鍼砭爰感懦夫此歛華落實之候學之善用其才
者也古人詩之集大成者必推杜陵其大者無間然矣
而集中丐求得失喜而奉諛怒而譏調如是者時亦有

之後代山人詞客之盲貪者每竊撫爲口實使杜陵見之必悔以爲俑不可作今人詩吾甚閔吳梅村梅村撫今傷昔俯仰留連其憂慚悼悔之意時時逗露欲覽者知其由來而華美太盡終不及杜元孝有大氣鼓橐其中鬱不得逞遠覽放遊東縛歸里非其所好磨礪圭角低頭就之隨物肖形以其類應渾渾莫窺其際間有刑天舞戚銜木填海之思躍冶迸出隨即遮埽滅去爪跡始以我法用古人久之並不見法惟有真意盤旋楮上予故謂元孝今之杜甫也予時病髀間瘡繙詩卒卒一過亟跛行市中覓元孝面論始覺快卽席不寐從枕上

序之相與真氣感激世之知罪不敢辭也

序

青州友弟趙執信秋谷撰

余聞嶺南陳先生元孝詩名二十年於茲世之論詩者皆莫能爲之品目余亦無因得而讀焉若世之所論則固嘗聞之其於脩飾聲貌者則目之曰學唐者也於穿鑿章句者則目之曰學宋者也其實不過沿明季之末流承時賢之繆習耳然未有不強以名其似獨於先生無譏焉余疑其必有異今者過嶺晤先生於羊城坐語始定余輒以詩爲請先生曰吾不工詩也吾有意而不自達焉則以韻語達之其始也格格焉繼也亶亶焉後

遂出於吾意之外而不能自止人之見之以爲似某代某某也吾故不自知也余俯而笑曰是矣固疑之顧先生之言詩何其適合於余之言也余言之而爲世所怪且忌相與詬辱排斥之不遺餘力先生獨以與世隔遠僅不入於品目而已乎旣而受詩而讀之一如其所自言無少歉蓋余頗嘗觀宋人嚴羽之論詩也其言貌爲精微明人徐禎卿王世貞從而附和之惑亂人聽三百餘年而其徒之論其詩也則曰皆不能如所自言固知言與爲之之不易副也今先生獨能自副如此則其言必能獨契於古不逐逐於世俗足以昭明乎來茲者然

其詩之可尊尙而傅又豈徒以其名乎哉余晚得讀先生之詩旣大快其積願又自以言爲世忌不能改悔失意薄遊于萬里之外而得持論之同於先生兼以堅其所自信而幸其不孤也乃從而爲之目曰先生之詩古體汎濫於元祐以還近體侵尋乎大厯以上謂先生以爲何如先生曰子之必名余於似也其自待視二十年來之世之論者若何也請子自書之以爲吾序

序

古閩晉江潘鼎珪子登撰

五嶺陳獨漉先生既沒之九年戊子季冬其友人晉江
潘鼎珪有事於此將賦歸告別於先生冢公端木世兄
丐先生遺集以歸夜拂几挑燈讀凡得詩文若干卷有
先生手筆錄者有他人旁抄付梓而未畢者蓋幾委於
斷簡殘篇而朽腐蝕剝於蠹魚之口者爲黯然久之旣
而曰是雖吉光片羽抑亦豐狐文豹之一斑也意必有
光怪陸離之筆低昂慘淡之音以發其患難死生抑鬱
沉痛欲鳴不敢鳴之隱於是乃凝氣卒讀其曰始遊集

小禹初二集則曩所受讀於先生間多朋遊唱和之什雖微杼其性情猶多隱忍諱忌之苦也其曰七別咏古諸篇則又先生患難之秋杼其夙抱猶有少年勃鬱之鋒未盡木雞遂養之候志士猶或勉也其所往來酬答四方人士論詩論文諸書與序雖克自樹藩籬鳴一時風人之盛三代以下瑰異挾奇之英往往優之未足爲先生獨也唯最後得其所題先傳後與諸先友壙誌祭文乃少小得其尙志鬚眉一二銜痛悲憤苦臆爲一惻然而猶以爲未得其平日所謂全副精誠一腔熱血以出也於是復終始披閱又最後始得其哭同室湛太君

之文反覆熟誦則忽不覺其且誦且泣淚淫淫下不能
卒篇也於是乃廢書而嘆曰嗟乎世無程嬰公孫杵白
久矣令非是老孤何以活如斯作固雖先生發其報德
未能之私抑實先生率臆寫其當日枕戈寢塊遺怨也
世人不知謂爲先生蒙難之後教子成名今且漸卽貴
顯又其平日多浮沉玩弄於詩酒酬應之場冠蓋赫奕
之所似不能副其初志者不知此皆皮貌之觀非真能
論定先生肺腑者也令先生當日而不教子成名則將
卒翦家學而使一經之遺至先生一人而斬不忍也若
夫名之成否則聽之後昆潛見之各有時非父兄所能

逆覩也不特此也又令先生而不優遊於朋友冠蓋之
交陶情適趣於吟咏文酒之場則又必將屏世絕俗逃
入空谷不幾自外於光天化日生今反古爲一狂悖謬
戾之子乎且曩戊午大獄之興驚惶未定又勢有所不
可也嘗竊譬之世俗匹夫匹婦之倫間有可歌可哭之
事欲以寄其歌哭未能者一處暗室屋漏空天寂寞之
下必一破口失聲外則否無他不可言之傷非他人之可
堪聞見也然則先生平日之哭凡其可見於詩與文以
與世人共賞者必悉非其暗室屋漏之時空天寂寞之
頃可知也夫脫其覆巢破卵之生死之又死乃卒以全

浸假而少讀父書又浸假而少闡父烈又浸假而歛驚
魂於垂定追平昔之過庭乃以盛大昌明其文章激昂
發揮其忠孝此非有天焉相之不能與終始百摧折自
鍛煉之不可是則先生斯文寧易悉舉爲世人讀與讀
先生斯文寧能漫易苟且作爲評誌之語哉其必千載
而下庶幾有一二尙論君子發而明之余斯文不過粗
以平昔之所聞于先生與今獲誦諸所遺集而私發其
臆見如此姑以筆之於尾而敬俟焉

初刻自敘

余自志學以往皆爲患難之日東西南北不能多挾書
自隨而意有所感復不能已於言故於文辭取之胸臆
者爲多而稽古之力不及於昔人矩度蓋闕如也每以
自愧不敢示人而亦妄自謂丈夫當有以自見何至作
此冷淡生活今四十無聞老矣恣方將請教於大人長
者吾之善不善當與天下共見之何有區區誦文之末
哉因命兒曹彙爲一編偶一省覽輒掩卷太息自傷失
學而已甲寅九日獨漉子陳恭尹書

獨漉堂詩集目錄

第一卷

初游集

增江前集

中游集

第二卷

增江後集

第三卷

增江後集

第四卷

江村集

第五卷

小禺初集

第六卷

小禺二集

第七卷

小禺三集

第八卷

小禺後集

第九卷

唱和集 卷之一

第十卷

唱和集 卷之二

第十一卷

唱和集 卷之三

第十二卷

唱和集 卷之四

第十三卷

唱和集 卷之五

第十四卷

咏物集

第十五卷

詩餘

第十六卷

凡五卷俟刻

壽言集

男顛端木編次

孫世和校字

獨漉堂集卷之一 凡三集

羅浮陳恭尹字元孝

初游集

小序

余以崇禎辛未生于錦巖之東隅十二而生慈捐背免喪補諸生十七而先府君殉節明年戊子奉卹典于端州游於是爲始前此非無游也從先君車轍猶之家也非無詩也未成聲也已丑之秋執金吾於禁闔其冬假歸庚寅避亂于西樵辛卯春築幾樓于寒瀑洞其秋之閩壬辰春自閩而之匡廬及秋汎彭蠡而下止於杭之西湖癸巳訪舊於

姑蘇因歷金陵宛陵道陽羨還杭州其冬買舟南
歸甲午春還抵西樵七年之中儻而冠蓋儻而瓢
笠儻而漁舟儻而樵斧不無乘興之行亦有不得
已之別其間歸錦巖者前後百日有餘然而焚獨
一身蕭條四壁猶之客也故皆謂之游其詩雖未
成聲而哀傷之所自始也自己丑迄甲午之春存
其稍可觀者爲初游集

拜恩感賦

御史封章更表忠詔書前後出行官家門已積淪胥痛
國典猶追式遏功唐祀睢陽存兩廟漢崇司馬列三公

孤兒拜舞威顏下血淚憑添汗簡中

春感

石羊城下越王宮天盡東南浪拍空萬頃可憐春飲馬
重關不見士彎弓威儀有日過三輔草木何年借八公
寒食古臺新雨後斷笳零亂起悲風

龐祖如見訪

重巖行樂處回首但雲陰別我歲華改逢君秋色深出
門遍衰草托足惟空林欲謝人間世論文與素心

哭外舅湛公

公卒以六月干戈阻絕冬未始聞

碩德堪千載高名重一時黃槐隨鳳詔彩筆對彤墀下

座人皆仰微言世所思遊輕駟馬貴歸盡綵衣嬉問訟
中途反評才滿月移不安林下席將飽路傍饑當食推
盤粟妨民拔露葵郭生難得友鍾子信堪師以德應能
壽論年不及衰壤梁歌已矣朝菌忽先之罷市鄉人哭
憐芳楚老悲酸風朝颯沓寒雨夏淒其弔客來飛鶴聞
窗怨子規自嗟逢世難飲恨向天涯望海情何極尋鄉
夢每疑烟塵銷未得書札到何遲昔者趨庭訓因之拜
羽儀稍能酬客語才解誦親詩不以東牀傲殊深戶牖
知國憂期共奮家難忽相隨廡下依臯伯舟中學范蠡
提攜無異父期許欲過兒離別奄踰歲風流渺莫追長

歌淚如霰何待峴山碑

西樵旅懷

二十之齡客途強半六年度歲各在一方感日
苦多浮生如寄西山冬盡風雨昏昏追昔傷茲
淒然有作

羅浮風暖鷓鴣啼山下梅花客未迷十里嬌歌傳玉笛
一竿殘月泊沙堤生存華屋人何處營壘清秋馬獨嘶
扶醉西州他日路潘郎懷舊豈堪題

牂牁滾滾向東流綠浦黃龍識御舟初日平沙羣躍馬
二年杯酒獨登樓星連牛斗曾傳檄寒報湘沅盡賜裘

孤棹一辭天萬里幾回風雨吼吳鉤

高樓斜月倒銀河長路朝天響玉珂雉堞影連飛旆密
馬蹄香踏落花多風中短笛翔鷓鴣樹底輕塵散綺羅
祇有數峰名石室著書畱待史臣過

江城北面是山家細雨西橋石路斜九日歸來澆綠酒
幾年人去落黃花牙籤舊架唯餘蠹玉樹空庭但噪鴉
猶有鄰翁思手澤壁書珍重與籠紗

涕泣經年自一身南天回首又風塵低徊不死緣無子
潦倒何顏復向人犬馬豈能忘舊主夢魂猶恐負先臣
西山有屋臨溪水便作桃源洞裏春

答何友大

昨夜月明夢君廬今夜月明得君書書中歷歷何所有
半幅蠻牋詩一首上言所苦在有羨君山中看桃花
桃花如錦覆山春此時山中望故人別時有約今中止
把札自疑猶夢裏山樓初築西山池三月艸應齊
池頭濯足清溪水何日山中與吾子

送莫休倩英卓今

手持青竹杖相送白雲端山裡逢人少君來作別難亂
泉侵宿夢疎柳隔垂竿舍此空歸去重期能不歎

寄蔡良若

朝起望山路雜花虧蔽之日莫有來人而非心所思子
行亦不遠曰歸何乃遲清溪日澣濯猶恐衣裳緇

寄家賚子

小池之南摘蓮子記得搖舟弄江水龍津渡頭秋風起
布帆一別三百里飛鳥西飛何其急歌者何人悵然立
深樹涼蟬曉鳴澁疎簾細雨當窗入桐葉如啼柳如烟
昨日夢君今日眠

送王說作

相送已惆悵清溪更亂鳴未窮生死理難了別離情細
草秋無路長林曉有聲不須今夜月還似昨宵明

送饒侍御石帆

玉驄踏盡天南路，更掛征帆向何處。
林木還留海燕巢，歸人却背秋鴻去。
飛雲飛葉滿前山，和月和霜度庾關。
庾關北下鄉園邇，五老香爐相對起。
荷鋤且作種瓜人，鐵面人知真御史。
一疏曾令死者生，又令生者心爲死。
西風寒山酒旨捧，離觴酌君子。
靈蛇有珠蛟有淚，願借豐城三尺水。
報恩報讎報知己。

梅子潭紀夢

浮雲離離颭其風，雨扁舟獨寐夢。
我嚴父曰嗟曰嗟汝，行良苦悠悠道路矧。
茲鼙鼓自汝之先，未絕如縷有子。

其傳於今爲五無曰子薄諸靈所怙敬汝慎汝無忘先
祖再拜以跽小子稽首暫別我父日月以久鬱鬱子心
如結予口牽衣欲言捧親之手其衣焜然其手載溫乃
欣乃犇乃蹶于門起而傍徨尙聞其言疾呼我父其人
曷存維舟搖搖維雨彭彭風回一壑萬竹之聲牛衣轉
側如卧春冰行漸老大實慚所生激激潭水舟平濟之
浩浩親恩心乎繫之烈已前人烏乎繼之我歌我謠庶
幾勵之

發閩中向匡廬寄蔡艮若

勞生同逆旅何處是他鄉漸聽人聲改才知客路長買

舟彭蠡月回首洛橋霜指却飛花笑閒身爾亦忙

建昌河上

十月辭西山蒼茫日東走遲遲閩越路東風變楊柳扁
舟亂河曲旅泊成搔首無衣知春寒獨宿知夜久
遠行子纔知慕父母

莫折棠梨花花枝刺君手莫戀春風時春風白人首春
風低野草遙見原與阜昨日少年人長松生左肘

雜詩

駿馬黑貂弓悲歌燕市東少年尙意氣不數古英雄俠
骨窮逾壯冰心老漸空浮雲無定所舒卷任秋風

夜中歎

秋風蕭蕭吹黃榆黃榆上有雙啼鳥寒霜滿枝栖不得
夜久無人時相呼西樵有客匡山裡一聞此聲夜中起
十年含歎爲誰來嘯倚芙蓉匣中水

過金陵不泊

故都殘照在一望尙崢嶸山擁吳雲峻天連楚水平到
秋禾黍意爲客古今情高寢長松外遺臣怯近城

西湖

山中麋鹿若爲羣嶺外雙魚杳不聞貧甚獨存馮客劍
雪深持上岳王墳西湖歌舞春無價南宋樓臺暮有雲

休恨議和奸相國大江猶得百年分

送人

不辭行數里相送及河橋北路邯鄲遠東風緒白驕歸
身征戰後洗耳聖明朝未有重期日題書莫憚遙

憶昔

憶昔十五六形容一何好高談溢四座賓客驚絕倒日
月易以邁春華豈長保我行如昨日兩度見青草天涯
勞苦遠異路風霜早相逢少年子自顧已枯槁何待兩
鬢白然後始謂老

西湖雜興

隔江山萬疊相對不知名野寺宜孤夢春風懶獨行
閣陰雲乍上林暗葉初生自住西湖後何曾暫到城

岳王猶有廟宋帝更無宮水夾層城麗山盤萬戶雄
園陵深夜雨松檟冷春風無淚揮前代吳燕在眼中

明月有相憶天涯祗自親江山不可語意氣向何人
鶯踏落花暮燕銜孤屋春年年別離盡無淚與羅巾

別來無信息歸雁人殘霞故國應芳草連宵夢落花吹
箎吳市月垂釣越溪槎見說佗封地依然屬漢家

京口舟中

小小舟長數尺濛濛雨
水驛西風起淫淫黑鬪孤臣

年年客釜中着水當自乾腹中着愁當自寬男兒眼大
天地小麒麟閣蟻蝨肝

虎丘題壁

虎跡蒼茫霸業沈古時山色尙陰陰半樓月影千家笛
萬里天涯一夜碓南國干戈征士淚西風刀剪美人心
市中亦有吹篴客乞食吳門秋又深

歸自吳越與家皖翁龐藝長賚子弟握手龍津醉
後成詩

松溪殘雨濕征衣小泊村橋叩竹扉萬里共驚吾尙在
三年偏訝信何稀棘林雪盡銅駝冷苜蓿春生鐵馬肥

醉死君家都莫惜天涯多有未能歸

與蔡良若楊無見夜話

中夜不成寐憶君前可知乍從燈下到猶似夢歸時屈指論年月開襟對酒卮誰能更碌碌辛苦話天涯

過何知澹新築

主人既不俗能使林園清未雨小池淺將昏初月明結廬七八尺啼鳥兩三聲種得忘憂草如今花又生

舟經故里不泊

東林日未出一望但蒼蒼舊宅諸峯下寒江繞郭長十年春涕淚二月雨帆檣不爲營先塚何因對故鄉

葉世穎蔡艮若同登金紫峯作

空林採藥倦寂寞憩禪扉買得山村酒遙從風雨歸雲
生層嶂合春盡落花希向晚平疇上閒閒一鶴飛

旱夜

饑歲蘇猶未農時旱可憐無田春望雨不寐夜觀天朱
鳥垂檐沒銀蟾入戶圓鄰家桔槔叟潮上獨撐船

增江前集

小序

甲午春予歸自吳越首夏僦居新塘始有室焉新
塘增江入海之口也虎門在其南黃灣在其西外
舅如珩湛君之家在焉予往者複室逃生之所也

明年乙未與蔡子良若就何子不偕之鄉結茆荷池之上讀書稽古倦則放舟仰臥荷香中致足樂也丙申病於梁子器園寒塘者二月秋與蔡何二子爲陽春之行丁酉首春奉先公大司馬彭夫人柩合葬於增城九龍之山其秋與何子爲澳門之遊明年春偕出厓門渡銅鼓洋訪故人於海外秋半復同爲楚南之行自楚行之前僦居新塘之後五年之詩錄爲增江前集

僦居新塘送葉世穎蔡良若何友大不偕歸里

虎門送君晚白日落蒹葭故里不同去他鄉獨作家多

離愁覺減人世嬾逾加已有西來約還山待菊花

乞食翁

冥冥青楓林戢戢歸飛翼飛鳥亦有巢老翁行乞食問
翁何方人揮涕答不得良久前自言家在東山側薄田
五十畝父子藝黍稷宿昔天地平黽勉努筋力中婦提
壺漿小婦當機織老妻低白頭扶孫共匍匐冬日農事
歇斗酒呼親識雞豚稻粱飯壯我衰顏色寧知屬戎馬
秋毫見取索一歲耕且鋤不足供賦役芸田倦未起肢
體被鞭策貧家力已竭公家求日益有田以自養反以
速窮厄欲賣與豪家鄉鄰少人跡當時富貴者荒草生

空宅回頭語孫子流離任所適重恐官吏至豈能受逼
迫黃泉亦相見何必人間客欲呼一飯別盜無半升麥
出門各分手痛哭辭阡陌哀哉竟至今兩不聞消息老
身一葛衣朽爛委荆棘餓死汚人鄉不死長悽惻新朝
澤萬物我獨羅斯極下民日憔悴上天安可測

臥病

海門送人地人去見波濤東路離居久西風病骨高背
墻施枕簟當暑着綈袍頗悟無生理蟬聲在遠臯

新別

戶外猶殘月江邊已曉春輕裝來去易孤燭別離新角

枕迴憐汝牛衣莫笑人請看原上骨豈得在生貧

送梁器圃歸邑

汀洲初雁飛送客釣魚磯故里我曾夢深秋君獨歸
荻花迎棹起楓葉到城稀爲問先人宅門前柳幾圍

閒居

閒居冬已盡獨坐念將衰霜葉不親樹寒花多苦枝
單衣勤向日薄命拙逢時莫作將來計人生未可知

又

羚羊千丈峽鐵馬一秋塵巾幘遺諸將干戈戰市人
析骸猶可爨三版未成湮只恐東南畝明年不用春

新塘早春懷蔡艮若何不偕

春雲漠漠虎頭東，幾日移居杏再紅。
三徑草生殘雨後，數家門掩落花中。
鄉山久別吟兼夢，水驛多情浪與風。
有約扁舟未能去，幽期空負釣魚翁。

宿梁器圃寒塘

衰柳亭邊酒數杯，扁舟昨日虎頭回。
結成茅屋竟何事，開到黃花人又來。
小郭乍寒山有雨，平池經旱水兼苔。
舊家正在江城外，深夜無人莫上臺。

四時白紵歌 春白紵

新林生葉花交飛，珠簾初日流素暉。
洞房夜燭光力微。

起舞君前歌露晞宛如游龍翩如鴻骨柔態變不可終
高舉長袖雲迴風鳳文雙履金縷衣長跪爲君擎玉卮
芳年逝者已若斯

夏白紵

草螢本質昔已枯化身今比明月珠飛君華堂綴交疏
何況賤妾不肖軀能巧笑工步趨長眉的皜承清臚不
不敢自許衆道殊幸離下土升階除雲房別館如天居
奉君顏色今夕初秣君駟馬豆以芻醉君吏士人石醺
願因微風達區區晝長夜促樂斯須

秋白紵

素衣輕舉襪鞋紅朱唇不動音微通如驕似怨不自容
翩若芙蓉秋被風輕絃細語傳纖手寄心贈君君不有
白雲東下雁南飛合顏一去不復歸

冬白紵

攬輿匝地朱復殷鳴環顧步何嫋嫋文犀約臂辟重寒
含聲未吐氣若蘭左顧右盼生光瀾堂上清歌林外嘯
積雪遙光凝玉面雙心一意俱迴旋百媚邀君流一眄
千秋萬歲非所羨

夜白紵

天階璧月霜始凝玉繩西倚銀漢橫杯疲客醉不自勝

佳人含笑燭下興垂輝振彩四座驚軒軒忽若朝霞升
人生快意不在他高賢嘉會酒且多秦簫激越齊瑟和
日月逝矣如流波永夜如年君弗歌百年如夜將奈何
鉅鹿公主歌辭

官家出游乘駟鐵毳殿連房象宮闕

其一

殿前女子持

絳節手彈琵琶顏照雪

其二

中官西官同羽獵何以知

之雙鬟結

其三

瑯琊王歌辭

新買五尺刀爛熳芙蓉燄曉夕時一開取照幽人膽
人言瑯琊賢我獨未曾說長揖交戟中左右驚吐舌

飛花亦有蒂浮梗故有根四體如輕埃因風集誰門
長安八水背清渭流最急一夜西北風怒濤寒自立
瑯琊大道王更唱瑯琊曲側有如花人許以英雄目
劍室雙金龍夜夜鳴中篋不能青天飛枉用張鱗鬣
天不借日月日月終經天虎不借深山藜藿生路邊
寶馬鳴春風馬上人如龍下馬道姓名言是廣平公

雀勞利歌

蒼鷹飛飛雀勞利高者逢之下得計

折楊柳歌

白羽照邊月麗服明春風朝來試馬蹄躑躅垂楊東

家居楊柳下直路西北馳望郎不可見折盡門前枝
放馬在南澗馬嘶時向北龍出渥洼中萬人皆辟易
河北望河南楊柳鬱森森蕃漢雖二域春風無兩心
左手纒健弓右手結柔轡抽出腰下刀深勒燕山字

企踰歌

男兒欲作健不用持弓稍獅子一顧笑百獸毛自落
放馬在大野草淺馬騰躍鐵作身上衣明朝爲君着
前營看後營萬馬肅無聲前軍看後軍大旆蔽平原
男兒墮地日會有冲天時泰山與鴻毛各是人所爲

捉搦歌

好月在天常患缺硬弓在橐常患折男兒窮居苦無骨
老女不嫁忌嫁畢

兩株銀杏江邊老花者是公實者母天生神物必有偶
獨坐空房今白首

路傍古井人所食清淺分明辨沙礫可憐照影多行客
不見鬚眉見巾幘

江東蔗竿長丈二中間可啖兩頭棄少年往矣老不濟
四十五十無多歲

隴頭流水歌辭

隴頭流水流離四注念我勞人終身霜露

一解

弱水可途堅冰在鬚時無英雄咄哉丈夫

二解

上阪下阪秦川在眼左手把鞭足不能前

三解

月節折楊柳歌 正月歌

野雪猶未開水邊與林上次第送青來折楊柳不知思
已深祗訝春何久

二月歌

紅碧雨參差芳香滿林薄望歡殊未來折楊柳我有千
里心願寄雙飛鳥

三月歌

采薇薇已柔東西復南北念子何時休折楊柳持爲七

寶鞭追逐驂驪後

四月歌

寒消時未暑梅子欲成黃
標落當誰取折楊柳青春不
可追長條已堪掃

五月歌

家帶辟兵符螳螂誠有斧
不足禦隆車折楊柳刻作孟
嘗君才堪役雞狗

六月歌

大鳥怒而飛海水方飄揚
浩泐將焉歸折楊柳天作颶
母風四面來吹子

七月歌

揚州牛女紀孟月渡河秋人間復何似折楊柳蟻子識
窗前誇道天孫巧

八月歌

雲氣方四除明月有正色依依照吾廬折楊柳斫盡礙
門枝不患秋光少

九月歌

零露已爲霜穠華不堪翫晚菊餘芬芳折楊柳疎密葺
籬籬不負重陽酒

十月歌

天淨北風高，鷹隼盤空中。
意氣真雄豪，折楊柳鏃取董。
澤蒲一試穿楊手。

十一月歌

大野極羣陰，萬物方噉噉。
一復見天心，折楊柳立表測。
土中短長占日晷。

十二月歌

水澤腹已堅，坎險化爲夷。
走馬渡長川，折楊柳楊柳不
成陰。濯濯青松老。

閏月歌

厯象有前期，天王在門中。
百辟盛威儀，折楊柳四序相。

周流盈虛信天道

日重光

日重光祭何雞方鳴日重光昨日之日固當舍我而行
日重光懷乎若淵上之春冰日重光過中則昃西傾日
重光年在壯盛難恒日重光譬如大將背水陣兵日重
光照是下土下氓日重光追羶逐臭如蠅日重光唯有
達者成名

月重輪

月重輪照天下使天若無明月萬古當爲長夜何夜無
月月有虛盈誰爲匪民達者成名

秋行

亂竹微開一角莫雲遠帶孤村人到綠楊下馬屋迎秋
水開門

萬峯谷裡村路獨木橋西酒家對客山翁白髮當壚老
婦黃花

舊宮荒草何處落日蘆花繫船漁子數燈歸盡江潭一
雨蕭然

酒醒已離孤店燈殘莫寫鄉書曉月啼猿未已秋山匹
馬歸歟

何友大問余病於寒塘

十里彫胡渚勞君艇子來棹移花下雨人上水邊臺少
別經三月深情盡一杯病餘存舌在今夜話能陪

厓門謁三忠祠

山木蕭蕭風又吹兩厓波浪至今悲一聲望帝啼荒殿
十載愁人拜古祠海水有門分上下江山無地限華夷
停舟我亦艱難日畏向蒼苔讀舊碑

醉夜

黃雲峯外雨雨後別山公客醉溪橋滑人歸夜火紅旅
魂思北首病骨入西風長歎厓門上明朝路又東

七月八日早行

行子及清晨雞鳴在四鄰
星沈牛女夜燭照別離人
樹勢迷前侶江濤怯病身
遙遙盪舟子招手荻花津

病柳

黃落亦復好青青將若何
受人憐不久當路折偏多
艷節成虛往嚴霜幸未過
金城舊栽處流涕怨蹉跎

擬古

橘子始可食往往辭其枝
孝子方欲養父母長別離
墓上椎牛羊不如生蒸梨
高爵耀閭里無親持慰誰
魂夢中夜來九原知不知

寄生在高樹樹枯枝不繁
托身共生死所惜非同根
昔

我三小弟俊邁難具論國難一時盡反令愚者存豈無
友朋好終念骨肉恩不見蒲葦中鴻雁相飛翻雙雁飛
上天孤雁無與言

射虎射石頭始知箭鋒利居世逢亂離始辨英雄士我
生良不辰京洛風塵起生死白刃間壯心未云已猛士
不帶劍威武豈得申丈夫不報國終爲愚賤人中夜召
僕夫將適趙與秦方建金石名安念血肉身抗手謝儔
侶明日西問津

夜發甘竹灘

灘頭潮落樹昏昏夜半移舟出水村一渚暗雲迷大雁

片帆春雨下江門，愁來每失芳菲節。老去多慚父母恩，
明日岡州花下醉。此心持與故人言。

代閨人新月

夫婿遠邀勳金鞍，西入秦空閨見新月。終夜惜青春似
鏡難全掩，如眉不解顰。爲銜將落影，持照未歸人。

中游集

小序

予之初游也，志不期歸，念二人之窳窳未卜五卅
之宗祏無託，乃黽勉畢婚，雖家寄增江而心未嘗
不在萬里外也。丁酉春旣襄葬事，戊戌仲秋復踰
大庾嶺，取道宜春，度歲於昭潭，而滇黔路絕，明年

乃登南岳汎洞庭順流江漢之間其秋憩蕪關遇
海舶之亂輕舟濟江歷中都治寒衣於汴梁北度
黃河徘徊太行之下冬中南還自鄭州信陽至雲
夢登舟度歲於漢口庚子春初溯衡郴下韓瀧三
月抵家是游也志在西南而行乃東北故所至若
遺跡焉始予十二丁母夫人艱於錦巖苦次夜夢
有大象十餘頭乘舟過吾門者象上有人羊裘而
操琵琶宿昔所未覩也且以白先公先公曰異夢
也其必有徵是行也於鄭州道中遇象十三自南
而北雨雪初晴其人皆披裘坐象背而絃歌十八

年前夢中所見也詢其自來乃滇池所獲子之飄泊於此命也夫蓋自是無復遠游之志矣彙是游之詩爲中游集有數義焉中年之游也中州之游也有初必有終有初終必有中子其能終於不游乎謂之中游若將有待也云爾

宿董无休五羊寓舍畱別

雨歇空堂秋氣生酒杯無惜坐深更扁舟此去復爲客
一宿緣君暫到城夜月幾時還共照楚山應恨不同行
西風萬里傳書處待汝題詩贈屈平

別楊無見因東岡州同人

結束遠行邁未行先送君
秋江下白露今夜向黃雲
此別渺難定臨岐何易分
還將努力意傳語故人聞

發舟寄湛用嗜天石鍾裴仙

扶胥古渡水淒淒
雨後移舟望轉迷
數口寄居秋草外
一身爲客楚雲西
家無兄弟依良友
地夾河山畏鼓鼙
知己片言應不負
亂離妻子藉提攜

留別諸同人

霏微殘月曉風寒
生死交情話別難
入楚客無燕匕首
送行人有白衣冠
舟辭香浦鴻初到
馬踏梅關雪漸看
後會不須期故國
中原天地本來寬

度大庾嶺

向風長歎草蕭蕭
山壓重門石氣驕
千古霸圖俱寂寞
再來行跡尚漁樵
寄書黃木灣何處
走馬紅梅驛漸遙
欲掃蒼厓記名姓
少年時已薄題橋

江上別盧非玉

重逢又是異鄉行
一月孤帆共北征
江上路分彭蠡澤
雪中人向岳陽城
停舟此地丹楓色
買醉當壚玉笛聲
別後想君歌舞夜
姑蘇南望倍含情

送滌公

滌公到城久忽憶
丘中琴積雪移孤棹
寒湘共此心獨

歸紅樹外相待白雲深語我茅菴路衡山在隔林

自勵詩

聞道豈必早立德苦不固嗟余困蒙弱老大猶未樹五
十不稱天蹉跎已中路逝者誠已矣來茲可無懼先民
詔遺矩乃在行其素外物焉足希澄心任所遇每戒出
位思恒存周身慮毋曰獨居暗幾微漸成著毋曰戲謔
小君子有常德穴防終以決往水不返溯庶幾日三復
反躬永無惡

湘潭除夕

東嶠志萬里歲盡猶在茲茅堂閉積雪高臥湘川湄鄰

家節序意寒笛參差吹佳人急刀剪中夜聞聲辭畱滯
感未弭景物情難持褰衾蓋蓬首托寐通所思故鄉有
餘夢所思渺無期寤歎擊牀蓐反側傷肝脾人言有彼
此道遠不可知吁嗟壯士懷歲盡增遙悲

贈郭幼隗

陶公羲皇人濟世心復苦違時棄經綸養節薄簪組微
言寄簡策容色尚可覩昔人云已邈之子蹈前矩林園
發新詠往往見肺腑以置彭澤中識者昧去取匪直英
華美秉心亦猶古

又

駑馬出大宛繫之在漢闐長鳴眷西極萬里走空濶物
老德不稱筋衰力先奪繁陰盛淫雨修途渟不達側首
見驂驢塵中問饑渴言戀父母國已恐貳師拔脚踟立
長坂淚雜溝中沫苜蓿未可希生芻欲歸秣

湘上寄梁器圃

湘臯氣候暖風物猶近粵雪在野際青春遲柳間蘂出
郊踐芳草怨與王孫別河橋一分手六滿汀洲月靡月
不相思矧伊艷陽節想見山阿人行歌散元髮衡陽有
歸雁逸矣嵇生札

送雪公歸耕蒼梧歌

蒼鷹六翮不上天化爲春鳩啄人田壯士有力不搏虎
兩角肥牛耕瘠土毛摧羽落君莫歎龍屈蛇伸自終古
送君耕耕何所上有蒼梧之深山下有牂牁之長浦浦
下山田田上墅荷鍤來歸日當午曲枕右肱樹左股萬
事不理望膏雨

湘上讀書柬郭幼隗

高天何寥廓茅屋十餘尺上有飛晨風下有不歸客重
衣垢以敝散帙黯無色仰首慙壯夫垂心事雕刻

答別郭幼隗

天涯何意返征驂慘淡離懷酒不酣匝地柳條青漢上

斷腸春草綠，湖南難歸故國生。多恨有約乘桴去，亦堪
滄海茫茫。一回首美人遲暮在江潭。

發舟中湘將登南岳

芳草綠未已，孤舟發南湘。還當上巳日，遠適衡山陽。石
積水光碎，竹多風響長。客途春有酒，波蕩感浮觴。

宿羅克生

衡山三十里，樵子識君家。一路杉松雨，開門桃李花。乍
逢如宿昔，未老亦烟霞。歎息青燈夜，春衣冷欲加。

南岳廟

秩禮咸百王，茲山奠南服。如何奕奕廟，樸櫨今有屋。鋪

鐘仰東序高瓦墜平陸谷風飄崇基枯草下更緣上帝
當板板百神亦傾覆週檐盼層阿出涕立空谷

石浪菴訪破門上人

櫻桃花落正黃昏谷鳥驚飛客在門想得老僧春未出
竹根深雪屐無痕

贈大化上人

草屋蒼涼老此身重巖花木不知春故鄉南岳三千里
君在山中見幾人

南岳道中從石浪菴上至高臺寺

晨飯氣始晴初日在山缺紆迴出林莽揖與老僧別樞

衣陟天路百里上積雪適來歷崔嵬反視若丘垤清冷
墜冰響淅瀝霜枝折中峯方眇然將登且當歇

登祝融峯

祝融高不測雲雨及其半濛濛在太古乾坤猶未判九
州有餘覽旭日夜中且臨睨懷百憂因高發南歎

宿高臺寺

山南勢盤鬱開豁獨斯宇中天置茅屋上與祝融伍階
下俯衆峯牕間括南土夜冥江火近日出寒檐雨托宿
此最高終身未更數

下祝融峯向白門寺道中作

披離中林雪厭浥下山路緣高凜若墜身外不敢顧藤
藟援我行飛鳥爭我度我下羣木鳴我上寒雲沍迹從
逝溪遠心與幽賞住萬里方自今重期豈能預遲遲聞
遠鐘懍懍日將暮

白門別諾諾和尚

南岳千峯一衲棲小橋流水入招提山端遠影湘江盡
竹外閒窗楚岫低十日淹留春色暮中宵談笑月華西
岐途不用悲遊子芳草天涯路未迷

過洞庭湖

灌注合梁荆蒼茫四望平江山俱不到天水自相生失

路行湘浦期舟渡郢城風波此瞻眺真信地維傾

赤壁舟中歌

曹家老瞞狡而武百萬戈矛下荆土贅闢小醜夷羣雄
當時意氣無江東江東少年劍斫案驅風走火烏林岸
北船烟燼西蜀都吳王宮殿飛赤烏誰爲此謀葛與周
兩郎年幾二十頭雄圖已矣勿誰道赤壁舟中人已老
將發漢口毛子霞在武昌不得更別舟中夜坐作

詩寄之

滄波芳草暮生烟東望離心倍黯然短棹擬過黃鵠渡
輕裝催上白門船遙從江漢分流地坐到星河欲曉天

明日五更應已遠故人殘月正高眠

過昭關

蕭條半生事驅馬行中原人影亂馬蹄跋沙塵昏馬
饑走街草人饑那得殮西徂峴陽阪佇立昭關門古人
伍子胥聊可與之言

次鳳陽逢中秋

未到問沽酒早投城北闌莫令亾國月得照渡江人世
薄功名士秋銷戰伐塵餘生付樽杓畱醉上車輪

舟泊長淮關懷去年別者

長淮今夜月此是故人心萬里送行者徘徊楓樹林維

舟悵前別把酒戀同斟自我不相見知君愁至今

吹臺

風吹吹臺樹樹葉高下飛嗟哉兩游子遠適不念歸馬
蹇負橐行鞭斷持竹枝徬徨吹臺下據地擢素髭借問
客游子飄飄欲何之乃云適西北又不入帝畿聞有燕
趙士尙義如渴饑雖則如渴饑昔是而今非高岡多蒺
藜下室多伊威黃河問清水升斗不可希風吹吹臺樹
樹葉落不遠嗟爾兩游子遠行莫如返

夷山謠 夷山侯嬴所居

古夷山今平地車馬東西馳屠兒倚刀醉梁園枯草鷹

嘯風公子翩翩持角弓

博浪謠

前椎晉鄙後椎秦始

地并大梁

不信海西馳久飲東京

水

黃河謠

口哆聲嗔招舟孟津馬飲濁浪人立濁塵
貴輿賤騎飛軀逐利老反山阿白頭入地

山陽送趙客入燕

渣河東是帝京塵匹馬看君發孟津欲寄悲歌向燕市
荆卿行後更無人

山陽逢亡友蔡良若生日感賦

天壽各歸盡三年悲亦衰胡然既死後轉憶始生時寡
過我何賴多才人未知山陽今有作不爲笛聲吹

兒贛晬日旅山陽作

游雲極八表出山如有戀我孤望兒子及產不相見我
行馬蹄西兒子初生啼我行馬蹄北兒生已匍匐此日
一歲成此時鄰嫗盈空堂雜百物嗜欲開其情昏來各
出戶拍手嗤其父阿婦入閨房抱兒心望郎

賣驢

歸鞍太行下南及漢川湄遠歷風霜苦難爲蹇劣姿在

子常惜力于汝亦忘疲去落他人手筋骸愁自茲

歲暮登黃鶴樓

郊原草樹正凋零
歷歷高樓見杳冥
鄂渚地形浮浪動
漢陽山色渡江青
昔人去路空雲水
粵客歸心向洞庭
莫怨鶴飛終不返
世間無處託仙翎

庚子元旦毛子霞招同何不偕登黃鶴樓

君子羈心積此晨
鶴樓斟酌歲華新
城頭江漢一千里
座上羅浮兩個人
細草暗催行處綠
落梅飛盡隔年春
誰堪天下無窮路
來伴微生易老身

歸舟

積雨江漢綠歸心楊柳初芳菲空復爾少壯已全虛白
髮何難得青山不易居從今向田里所懼世情疎
舟路翠微上了然知寂機谿聲虛自答山色靜相暉飲
鹿妨人去栖禽擇木飛物情從所好吾亦薄言歸

楚縣踰山盡章流向粵初映花谿路閉含水石根虛淹
泊時仍杳羈愁日以疎殊方歸亦爾吾自笑懷居
水氣動羣木虛樓飛葉聲風燈無定照峽月不終明託
宿維舟夜臨瀧未濟情寸心平自若應任險中行

雜詩

泚泚東逝水愴愴南征子水逝水所歸蒼天曷爲此銜

悲慙君庭宵風動茅葦東井嘒方中天弧曜其矢聞君
旅其下長跪願有啓梁土多黑波馬渴君安恃

雁度葭莢黃月懸江漢秋離人喟清夜挾瑟臨高樓西
瞻赤壁涯東思滄海流朱絃感英聲磊砢不可收下階
重太息古調今誰酬哀彼促織蟲有生亦何求衣裳非
所溫唧唧懷殷憂

杖策有所適乃至南山阿飛雪曜峻塗高冰積嵯峨仰
見雙羽人被服揚輕霞揖我升丹梯飛步游天河下窺
失五岳累塊存中華羣星與日月熠若流螢過命我一
丸藥天隕子不磨長揖謝羽人蓄志不慕多茲生有餘

責區區計其他回車復吾路路有張烏羅鳳鳥易高飛
羅雀如之何

霜至草木寒關河淒以風扁舟越湘水遲暮予何心美
人彩雲端欲往聞遺音雲端不可卽離別銷顏色三朝
掩明鏡對面不相識

商風自何來白雲起秋色梧桐下一葉百卉萋未息天
地方疾威美者先受抑捐生故有人困餒焉足惜豐此
百年軀祇爲螻蟻德

蕭蕭君馬鳴夜夜聞歌聲馬悲慕儔侶獨歌誰和汝結
東下空階仰瞻霜與露缺月銜東隅旄頭沒何處思爲

伺晨鳥舉舌催天曙

家臨青山側前望白楊道
遙遙孤墳下有土懷其寶存
思澤萬物一身乃先槁
駕言采杜衡涉野多秋草
同心復幾人相看日趨老

金節天地肅白日遄西飛
繁星不照物流螢有餘輝
灼灼宵征子車馬輕且肥
明燈集倡樓四角揚清絲
佳人映瑤席彷彿凝幽姿
迴眸粲一顧百萬焉足揮
錦衾旣以陳鴛鴦罥重幃
歡樂永今夕此生不願餘
佳人含笑言生死齊所歸

旭日臨高城城中何浩浩
樓臺動絲管金碧相照耀在

野方爲魚太康無乃早浩歌感疇昔瞻望淇園道下有
流湯湯上有竹窈窈河流日以溢竹生日以老

獨漈堂集卷之一終